

Regional News Unit AIR Aizawl
Tuesday, September 01, 2026

Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n Mizoram chu Winter Capital of India-a siam an tum tih sawiin an hmalakna langsar ber chu Winter Festival a ni a ti.
- Lengte rama sawhthing chingtu Pi Laldikkimi chuan Ginger Mission hnuaia mumal taka sawhthing chin chuan kuthnathawktute nasa takin a pui tih a sawi.
- Prime Minister Narendra Modia chuan Kyrgyz Republic khawpui Bishkek-a SCO Summit karlahak Russian President Vladimir Putin nen an inkawm.
- Sawrkar kum kallai thla tir pathumah rampum sum dehchhuah GDP chu zaa 7.8 in a thang.

<><><>

CHIEF MINISTER : WINTER FESTIVAL 2026

Chief Minister Pu Lalduhoma'n Mizoram chu Winter Capital of India-a siam an tum tih sawiin an hmalakna langsar ber chu Winter Festival a ni a ti.

Planning & Programme Implementation Department Conference Hall-a Winter Festival 2026 Organising Committee thutkhawmah he thu hi sawiin Pu Lalduhoma chuan Mizoram chu Winter Capital of India-a siam an tum mek tiin an hmalakna langsar ber chu Winter Festival a ni a ti a, Kutkawih eizawnna lama Mizoram tihlarna hmanrua tur a ni a ti bawk.

Pu Lalduhoma chuan Winter Festival chu Tourism Department bul tuma kalpui ni mahse department dang nen thawhho ngai anih avangin theihtawp chhuah theuh turin department hrang hrang a chah a ni.

Thutkhawmah hian Tourism Department Minister Pu Lalnghinglova Hmar leh department hrang hrang hotute an tel a, Winter Festival 2026 hman dan tur rel niin nikum lama Winter Festival neih tawh dan thlir let a ni bawk.

<><><>

MANIPAL HOSPITAL

Manipal Hospital hotute chuan Mizoram atanga damlo tam zawk an enkawl theih nana hmalakna thar an neih thu sawiin Mizo Nurse tam zawk hnathawk tura lak belh an duh thu an sawi.

Nimin khan Health Minister Pi Lalrinpuii hmalaknain a pisa ah Manipal Hospital hotuten Nurse Recruitment Drive neiin an thukhawm a, Manipal Hospital hotute chuan Damlo khum indaihlohna avanga Day Care Centre an hawn belh - khum 35 te chu Mizoram atanga damlo lo kalte tan bika an ruahman thu an sawi a. Experience nei Mizo Nurse tam zawk hnathawk tura lak belh an duh thu an sawi bawk a ni.

He thutkhawmah hian Directorate of Nursing leh Manipal Hospital tangkawpin Nursing Recruitment Drive an neih zel dan tur an sawiho a; Directorate of Nursing hnuaia Recruitment Cell hmalaknain Directorate of Nursing-ah interview neih nghal a ni.

Manipal Hospital hian India ram pumpuiaah Hospital 49 an nei mek a, chung zinga hospital 5 chu MUHCS hnuaia empanelled mek an ni a. Manipal Hospital hi India ramah chuan hospital nei tam ber leh nei tha ber te zinga mi an ni.

<><><>

SPORTS MINISTER

Sports Minister Pu Lalnghinglova Hmar chuan Badminton-a India tana medal la Thazuala leh Sainunmawia te a lawmpui thu a sawi.

Lagos, Nigeria-a August 26 atanga ni 29 inkara khelkh zawh tak Lagos International Badminton Classics ah hian H. Lalthazuala s/o H. Zohmangaiha, Chanmari West chuan India tan Silver medal a hlawh chhuak a. Yonex Sunrise Junior International Grand Prix, August 25-30 chhunga Pune a khelkh zawh takah Sainunmawia Sailo chuan Boys Doubles ah India tan Bronze medal a hlawh chhuak bawk.

Minister hian Thazuala leh Sainunmawia te hi a Social media account kaltlangin duhsakna leh lawmpuina thu a sawi a ni.

<><><>

GINGER MISSION

Lengte rama sawhthing chingtu Pi Laldikkimi chuan Ginger Mission hnuaia mumal taka sawhthing chin chuan kuthnathawktute nasa takin a pui tih a sawi.

Pi Laldikkimi chuan Ginger Mission hnuaiah Mizoram sawrkara Horticulture Department in mumal takin sawhthing an lin dan an enfiah tiin leithaa enkawl dan leh hunbi neia enkawl dan hrang hrang an zirtir tiin mumal taka an enkawl avangin an hlawkpui hle a ti a, Mizo mipuiten sawhthing chin chu hun hmasa lam atanga an kalpui tawh anih avangin Mizo nuna nghet taka awm tawh a ni a ti bawk.

Pi Laldikkimi chuan sawhthing mumal taka chin chu ramngaw ti chereu lo zawk ani tiin ram humhim zawk leh hlawk zawka kuthnathawh dan ani a ti a, Ginger Mission kaltlanga Ministry of DoNER in sum a rawn pek atanga Mizoram sawrkar hnuaia Horticulture Department a kalpui thei chu kuthnathawktute tan malsawmna a ni tiin ‘Ginger capital of India’ tih hiala Mizoram hriat a hlawh chu lawmawm atih thu a sawi bawk.

<><><>

DR K BEICHHUA

BJP Mizoram President Dr. K. Beichhua chuan nimin khan Assam Chief Minister Dr Himanta Biswa Sarma hmu in Mizoram leh Assam thawhhona tur hrang hrang an sawi.

Guwahati-a inkawmna ah Assam CM Dr Himanta Biswa Sarma leh Dr K. Beichhua te hian Mizoram leh Assam te chu state thenawm an nihna angin, kawng engkimah thawh dun a pawimawh zia sawiin, Mizoram leh Assam ramri chungchang pawh inbiakna felfai neih a, chinfel a pawimawh zia te an sawi dun a. Hei bakah hian MADC tan Guwahati-a Tribal Hostel sakna tur ram pawh an sawi dun bawk a ni.

Dr. K. Beichhua hi BJP Mizoram General Secretary Pu Delson Notlia in a tawiawm a ni.

<><><>

SAITUAL NCORD

Saitual District Level Narco Co-ordination Committee thukhawm chuan ruihhlo do kawnga hmalak zel dan tur leh khawtlang hruaitute nena thawhho dan an rel.

Saitual DC Pu Srinivas Sadi kaihhuaia thtukhawmah hian DC chuan kalkhawmte chu ruihhlo do kawngah theih tawp chhuah zui zel turin a sawm a, anmahni zawn theuhva hma an laknaah tha thlah lova nasa lehzuala tan la zui zel turin a sawm bawk.

Thutkhawmah hian Saitual District chhunga ruihhlo man hrang hrang tarlan niin ruihhlo kaihhnawihah mi 83 man an ni a, Kumin chhunga ruihhlo an man hlut zawng chu cheng vbch 227 nuai 90,11,950/- a ni.

<><><>

KOLASIB DC

Kolasib Bawrhsap Pu H. Dolianbuaia chuan inrinni khan Rengtetlangsang (National Highway-306) leimin a enfiah a, tunlai ruahtui a tlak nasat avangin mipuite leh lirthei khalh thinte fimkhur a tul thu a sawi.

DC chuan kawng siam leh enkawl hna thawk mektu NHIDCL leh an contractor te chu leimin leh chhiatrupna thleng thei laka inring reng turin a chah a, Kawng chhiat avang emaw leimin avanga lirthei chet velnaah khuahkhirhna siam a ngaih chuan a hma theih ang bera DC leh Police lam hriattir thin turin a chah bawk.

Bawrhsap chuan NH 306 paltlanga khualzin veivakte chu a tul anga fimkhur turin a ngen a. Lirthei khalhtu thenkhatte zingah kawng siamtute ruahmanna zawm lo an awm thin thu sawiin NHIDCL ten lirthei tlan dan tur ruahmanna an siamte chu tha taka zawm theuh turin a ngen bawk a ni.

Rengtetlang sang leimin hi tun dinhmunah chuan thenfai a ni tawh a. Lirtheite pawh harsatna awm lovin kalphung pangngaiin an tlan leh thei tawh a ni.

<><><>

SERCHHIP DC

Serchhip District ah Ui khuahkhirhna dan khauh lehzuala kalpui a ni dawn.

Serchhip Bawrhsap Pu Paul L. Khuma kaihhruai nimina Serchhipa VC Area hrang hranga Village Council President-te leh YMA Sub Headquarter hruaitute thukhawm chuan khauh zawka Serchhip District-a ui khuahkhirh dan tur chungchang an sawi ho a, Ui khuahkhirh tura hriattirna August ni 11-a chhuah tawh ni mahse ui khuahkhirh lova chhuak an la awm fo bakah midang tan harsatna an thlen avangin khawng lehzuala hmalak tum niin, Magistrate, Police leh vantlang hruaitute team hrang hrangah insiamin, veng hrang hrangah endikna neih a ni tawh dawn a ni. Ui chhuak hmuh a nih chuan man a nih mai bakah a neitute lakah District Magistrate-in Criminal Complaint a siam thin dawn a ni.

Thutkhawma tarlan danin khawlaia ui khuahkhirh lova chhuah chu danin a khap avangin ui neitute chu “Kum 1 thleng lung in tan tir emaw, Rs. 5000 thleng chawi tir emaw, a pahnih emaw hmang pawha hrem theih an ni”.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan Kyrgyz Republic khawpui Bishkek-a SCO Summit karlakah Russian President Vladimir Putin nen an inkawm.Hruaitu pahnihte hian India leh Russia inkara sumdawnna, investment, energy leh ralthuam lama thawhdunna chungchang an sawidun a ni.

Prime Minister Modia chuan India leh Russia inkara thawhdunnain nasa taka hma a sawn chu a lungawithlak a tih thu a sawi a. Ukraine buaina chungchangah Indona titawp tura inbiak leh remna siam chu India chuan a thlawp thu a sawi bawk a ni.

President Vladimir Putin-a pawhin India-Russia inlaichinna tha tak a awm chhunzawm zel chu lawmawm a tih thu a sawi a. An thawhdunna chu danglam bik anih thu a sawi a ni;.

Prime Minister Modia hian vawiinah Shanghai Cooperation Organisation Summit ah hian thu a sawi dawn bawk a ni.

<><><>

GDP

Sawrkar kum kallai thla tir pathumah rampum sum dehchhuah GDP chu zaa 7.8 in a thang. Nikum tun ang hunah khan sawrkar GDP thanna ni zaa 6.9 a ni a. Union Ministry of Statistics and Programme Implementation chuan nimin khan April atanga June thla chhunga GDP tehna hi a tichhuak a. India eibar dinhmun chuan nghet takin hmasawn lam a pan tih sawiin khawvel dinhmun derthawng tak karah nghet takin a kal a ti.

Prime Minister Narendra Modia chuan GDP zaa 7.8 laia a thang chu hlawhtlinna ropui tak anih thu a sawi a. Mipuite thawhhona leh theihna avanga heng dinhmun hi thleng an nih thu a sawi a ni. Union Finance Minister Nirmala SItharaman leh Union Home Minister Amit Shah te pawhin GDP thang chu lawmawm an tih thu an social media lamah an tarlang a ni.

<><><>